

敬

事

草

敬事草卷十目錄

催允吏科掌印官揭帖

言項鼎鉉揭帖

辭雲南捷恩疏

大典揭帖

辭雲南朝鮮二恩疏

請皇長子講學揭帖

回大典聖諭揭帖

三辭雲南朝鮮二恩疏

四辭雲南朝鮮二恩疏

受廕辭官疏

萬壽節屈請增閣臣疏

乞免蘇松欠糧官追罰揭帖

獨任三載請增閣臣疏

請舉皇長子大典揭帖

回聖諭催發揭帖

首輔永謝乞補閣臣疏

諭行典禮回奏揭帖

頒三十年曆賀揭帖

請吉期進冊文揭帖

回黃河決責問揭帖

請上徽號揭帖

進冊立詔草揭帖

詔條三事揭帖

催允行取官揭帖

回徽號諭札揭帖

諫冊立改日揭帖

催發冊文詔書鑄冊寶揭帖

回補賜冊寶可權宜揭帖

犯諱自陳揭帖

謝揭帖

言查叅之旨難發乞寬宥揭帖

請發徽號及儀注揭帖

催點河漕督撫揭帖

回聖諭揭帖

言徽號不宜四字揭帖

謝特賜揭帖

賀徽號禮成揭帖

請福王婚禮揭帖

大典成加恩辭疏

再疏

請出閣講學揭帖

拜命陳謝揭帖

言河漕揭帖

催存問輔臣揭帖

冬至謝加賜揭帖

言啟本不必批荅揭帖

請點總河大臣揭帖

請發新閣辭疏揭帖

請推恩補行取科道揭帖

言武職既予封當聽辭俸揭帖

歲暮代享諭回奏揭帖

敬事草卷十

柱國少傅兼太子太傅吏部尚書中極殿大學士臣沈一貫

催允吏科掌印官揭帖

題舊例官員新選必從吏科盡憑近因本科缺
掌印官四月大選等官尚未得憑赴任盤費罄
盡臣每出入朝門擁簇號哭情實可憐茲給事
中姚文蔚等具本再請伏乞 皇上早賜允發

七月初
五日上

言項鼎鉉揭帖

題臣奉命會同吏禮二部堂上官翰林院掌印
官考選庶吉士秉公絕私彼叅此酌亦已各盡
心力今日拆卷列名上進臣等因公同將廷試
卷取出對閱筆跡皆無異同惟項鼎鉉前後兩
卷筆跡不同事屬可疑有難作養伏望 皇上
將王陞等二十一名照例讀書項鼎鉉不許作
養以昭至公之舉

七月初
十日上

辭雲南捷恩疏

奏為誤恩渚被薄分難勝懇乞

聖慈俯容辭

免以追憂戾事該吏部接出

聖諭雲南逆酋

猛奉等逞兇肆亂撫剿全捷內閣輔臣殫忠運

籌勞績茂著茲特加恩示酬元輔志臯加無太

子太師還賞銀六十兩綵段四表裡次輔一貫

加無太子太傅還賞銀五十兩綵段四表裡各

廕一子入監讀書餘官如故都照新銜給與應

得誥命如勅奉行欽此移咨到臣臣不勝感涕

不勝驚汗隨該文書官盧受捧銀幣到臣私寓
臣謹焚香叩頭恭領容報名廷謝外伏惟臣待
罪輔弼八年於茲歲月空流罪愆山積獨以遭
逢天幸屢觀戡伐之成忝竊恩私數拜頻繁之
錫自撫多疚亦知控辭間蒙俯察微忱許安臣
分然多申重嘉命弗克固違器滿當傾福過必
累每于廷謝若罔容身今年三月內拜府江平
徭之賚至是纔四閱月也臣顙顙未及收悸膽
未及定而滇南之捷恩復下則雖甚貪鄙豈宜

辭雲南朝鮮二恩疏

奏為隆恩駢集內省益慚備瀝悃丹悉容辭免
以安薄軀以明臣誼事項者 皇上嘉滇南大
捷推恩及臣臣具疏辭免伏奉 聖旨雲南逆
酋撫剿全捷朕心嘉悅卿為輔臣朝夕贊襄勞
績居多加恩示酬寔為曩典宜遵成命不允所
辭該部知道欽此臣不勝感荷眷知而未敢拜
承嘉命也即日復接吏部咨奉 勅諭朝鮮善
後事竣內閣輔臣密勿運籌忠勲茂著茲特加

恩示酬元輔志臯加少師還賞銀六十兩綵段
四表裡次輔一貫加少傅還賞銀五十兩綵段
四表裡各廕一子入監讀書兼官如故都照新
銜給與應得誥命如勅奉行欽此該文書官冉
登恭捧銀幣到臣臣欲辭不敢謹叩頭恭領報
名廷謝外乃若忝竊異恩旬日再至如靈雨之
注柔枝滋液之為澤庸無欣欣過當尚之為霖
顛踣斯及一之不可何再之堪謹用控辭萬祈
垂亮伏念臣少讀父書先臣舉古訓以教臣曰

知足不辱知止不殆所謂止足非有期限分數之可言也無時無處而不可足可止然後謂之知足知止然後可以免辱免殆若待其既足而後知足何時始足待其可止而後知止何處方止其殆與辱踵至而不可悔矣臣服膺斯語罔敢失墜多取為忌履盛為憂矧今甚足而猶不知足可止而猶不知止殆辱之來庸可免乎臣觀自昔人臣當其憑藉寵靈之時何所不得卒之滿以基覆高以召顛或得而不能享或享而

不克終亦何所不有臣遭際 聖明叨隣一品
光于祖父施及子孫此窮巷布衣之極也府江
之命甫下而滇南之恩繼之滇南之恩正新而
朝鮮之恩繼之 皇上加恩於臣為榮臣也榮
不可以無德而享則榮乃羞之媒也為寵臣也
寵不可以無功而居則寵乃懼之階也履盛滿
之極立殆辱之衝雖德懋功高猶當挹損况涼
薄如臣而可無自量乎徼幸誤恩而渎忍不辭
則欺罔耳為虛讓以博 溫旨而終將受之亦

欺耳非臣所以事君之節也家世清約祖父有訓而躡等過恒更不知止九原有知將不以為歆而以為駭又非所以為人子之誼也伏望

皇上察臣懇衷停免新命庶畢臣小心事君之願且以免不慎辱先之愆臣下情無任迫切禱

祈之至

七月十四日
上十六日奉

聖旨雲南撫剿全捷朝鮮善後事竣卿為輔臣殫忠運籌朝夕匡贊加恩酬示寔遵舊典宜遵成命不必遜辭該部知道

請 皇長子講學揭帖

題本年四月初二日該司禮監傳奉 聖旨天

氣乍冷乍熱 皇長子講學四月初三日起免

欽此欽遵隨因接連暑熱輟講至今茲者已過

三伏時屬早秋不熱不寒正宜講學臣等擇得

本月二十一日二十六日皆吉伏乞 皇上欽

定一日照常講讀謹題請旨

七月十五日
十七日奉

聖旨溽暑未處天尚炎熱皇長子嘉禮在邇講讀

且候旨行

回大典 聖諭揭帖

題今日文書官冉登恭捧 聖諭到閣諭內閣

皇長子冊立冠婚及分封諸皇子前已有諭候
旨舉行且內外諸司遵旨靜俟未敢瀆阻即欲
傳行但朕壽節屆邇事體繁多况各該衙門所
造應用器物俱未完備昨又有旨上緊成造旦
夕傳旨若有瀆阻的嘉禮於明春舉行諭卿等
知欽此臣謹叩頭即時傳示禮部令在廷欽遵
外謹具回奏以聞臣聞之昔 成祖時 仁廟

在東宮偶失 成祖之歡群臣悚懼莫敢進言
適 成祖發一軸畫到閣命鮮縉題詩縉展觀
之乃一大虎顧小虎圖也遂恭題以進其詩云
虎為百獸尊誰敢撓其怒惟有父子情一步一
回顧 成祖覽詩而大感悟大歎賞父子恩愛
更加于平日焉今 皇上深愛元子欲成大典
而恐群臣以聒擾取遲發諭致戒群臣奉諭惟
謹誰敢有觸冒 至尊者第願 皇上深繹此
詩而體 成祖之心篤顧子之情以延我 大

明萬萬無疆之祚是在今日臣不勝惓惓十七月
上日

三辭雲南朝鮮二恩疏

奏為政體宜慎濫恩當收懇祈 聖明並容辭
免以逋辱國重愆事項因雲南朝鮮兩告成事
而加恩於臣臣再疏並辭奉 聖旨雲南撫剿

全捷朝鮮善後事竣卿為輔臣殫忠運謀朝夕
匡贊加恩示酬寔遵舊典宜遵成命不必遜辭
該部知道欽此部咨到臣愈增兢惕蓋臣之前
疏第言自揣非才恐速顛蹶耳而語未盡意亦
不中窾宜天聰之莫回也臣惟朝廷所操以礪

世磨鈍者惟是爵賞爵賞宜加則輕之若塊礫而不為濫不宜加則寶之如珍玉而不為恡故見予者知勉而不見予者知勸也今少傅崇階也誥廕懋賞也自昔勲賢之得此者指未易多屈也臣忝帷幄之寄絲髮罔裨而旬日之間焜煌遽起人不平之感播告朝野又滋人觀聽之駭矣方今曹署半空待次久滯奏牒每格典憲多湮而未聞有一振飭之令一整理之方獨是臣等加一官又加一官廕一子復廕一子渥恩

洋溢溫諭頻仍人必曹起而議曰上甚靳諸
臣恩何為於閣臣甚侈此為泰乎抑干之也厥
故安在又必曰彼持衡者不務平施而厚于自
封也如是厥咎安逃然則此一寵榮固臣隕越
之所為彌亟也且府江之賞在今年三月間耳
臣以為不宜受故辭今雲南獨何以異于是而
可受也東功昔當大敘時臣固辭賞不敢當今
何為者而食其餘前日之辭是則今日之受非
矣人臣事主惟是一心何宜屢遷而無定執也

伏望 皇上平衡政體愛惜名器將雲南朝鮮
二恩並容辭免無令人謂國家賞功鉅典壤自
微臣斯臣之厚幸而 皇上如天之大恩也臣
不勝悚息待命之至

七月十八日
上十九日奉

聖旨朕以雲南朝鮮兩告厥功卿為輔臣朝夕調
燮茂著勲勞加恩示酬原係舊典卿宜勉遵成命
慎勿固辭該部知道

原缺

四辭雲南朝鮮二恩疏

奏為四辭恩命一不敢承懇乞 聖慈必賜矜
允以成分誼以逭顛隳事項臣奏為政體宜慎
濫恩當收懇祈 聖明並容辭免以逭辱國重
愆事奉 聖旨朕以雲南朝鮮兩告厥功卿為
輔臣朝夕調燮茂著勲勞加恩示酬原係舊典
卿宜勉遵成命慎勿固辭該部知道欽此臣辭
不獲命危悚木集臣惟人臣之罪莫大乎欺所
謂欺者非必懷譖挾詐不可比于人數之謂也

誠蓄于心而不著于行誠發于始而不竟于終
見義而為之見利而遷之掩耳目之所不至托
口語之所不及而苟私其身終懷愧闕皆所謂
欺也心欲受而口言辭托名讓而實為矯亦所
謂欺也雲南朝鮮之賞臣既三辭矣臣即為讓
讓不過三自三而往豈宜更瀆所以哓哓而不
止者良以心不可欺而誠不可掩故也湛恩汪
濊豔骨驚心然臣期期知其不可此而可受則
府江當先受矣府江不受而受于此也是遵何

說哉借令可受則人臣之受于主上也何患無
辭在禮則長者賜少者賤者不敢辭而況于

至尊乎雲南越在天末捷書自遠飛來是役也
盡撫臣力也閣臣何力焉朝鮮之賞臣曩者已
懇辭矣臣不敢任功亦不敢任罪言猶在耳而
今竟受之夫不嘗臣鼎而嘗一爨謂之未有嘗
焉可乎是又臣之所必不敢也今天下沉淪者
多而 皇上甚重名器臣在群臣中未有所見
而獨享厚施滋臣罪矣願留未盡之餘官以還

朝廷願留未盡之餘福以還造化是用羅縷以
明區區毫不敢欺絕無矯飾伏冀 聖明哀憐
收回成命免臣再瀆渴望 俞音臣不勝披瀝

禱祈之至

七月二十一日上
八月初一日奉

聖旨雲南全捷朝鮮善後兩告功成卿為輔臣朝
夕贊襄勲勞茂著加恩示酬寔遵彝典卿宜祇承
成命慎勿遜辭該部知道

受廕辭官疏

奏為瀆辭已竭渥命復臨竦息難居昧心酌領
懇乞 聖慈俯容受廕辭官少安分義事臣頃
為恩命駢加四疏辭免奉 聖旨雲南全捷朝

鮮善後兩告成功卿為輔臣朝夕贊襄勲勞懋
著加恩示酬寔遵彝典卿宜祇承成命慎勿遜
辭該部知道欽此隨該吏部接出 聖諭勅吏
部甘鎮大捷二功內閣輔臣密勿運籌勲勞懋
著特茲加恩示酬元輔志臯無支大學士俸還

賞銀五十兩綵段二表裡次輔一貫加無太子
太師還賞銀四十兩綵段二表裡餘官如故給
與應得誥命如勅奉行欽此該部移咨到臣臣
伏地掩面有不能自容者蓋臣之四辭乃悃曲
極陳而四塵溫答不安殊甚尚未蒙見俞不安
尤滋甚又况前命未收後恩疊至臣聞之哽食
不生哽舟不行又聞之兩三日以往謂之霖草
木之所不能受也臣一月之間而三承晉錫雖
古功德並懋之臣未易居此臣何人斯而得無

患哉夫君有命而臣恭承之君有賜而臣祇受之禮也然必心安之而後可托于禮若今之屢恩者溢典踰常於制為侈賞與功浮於理為僭上行之固優借之私慈而下受之則貪昧之顯忒是烏可托于禮而曲文其鄙心也臣屢貢函章無一字不情實非惟未俞而更叨溢濫天下耳目將震動矣臣何能愛惜肝膽而不剖瀝哉心口徘徊必不得已則臣請受廕而辭官其受也所以明臣萬分凌兢順命承尊之義其辭也

又以表臣萬分謹恪守憲遵制之誠既不能堅
持縷縷之前言又何敢盡捐硜硜之小節且依
且違滋慚滋悚盖大權固制于朝廷而公議亦
操于天下 皇上賞之臣受之而天下宜之諒
之靡所誰何則於臣為榮不然而有一誰何者
焉則於臣為辱臣忝輔弼之位而不免於辱匪
臣之辱國之辱也酬功之典莫大於廕臣今受
其大而辭其餘則甚溢于分而汰于德泚筆甚
矣諸所餘者竢 皇上叶神符于泰階霈大賚

于天下而臣然後恭率百僚祇奉曠典用以修
示同朝增光先世視今無端受賞榮光當相萬
也伏望鑒臣微悃准臣受雲南一廕其加官給
誥及朝鮮甘肅陞廕給誥等恩俱容辭免則一
允有餘榮而九遷非所喻矣臣不勝蘊結祈禱

戰慄之至

上八月初三日奉

聖旨朕以雲南朝鮮甘肅三奏成功卿為輔臣朝
夕在公勲勞懋著加恩示酬原不為過卿乃五懇
情詞愈切雲南恩廕准卿祇承其餘特允辭免成

卿勞謙之美該部知道

萬壽節屆請增閣臣疏

奏為華祝騰歡班行虛左懇乞 聖明簡命輔
臣以重國體事恭惟 皇上萬壽齊天祥光流
繞貢琛獻賁充盈闈庭萬國雲從四夷麋至臣
比蒙三錫之恩叨承延世之賞與中外臣工恭
伸蹈舞豈任欣鬯惟是押班體重虛左多時無
以增光儀鳳之朝首率呼嵩之敬代庖之次廼
及于臣實滋忝竊之憂敢冒瀆陳之罪臣惟遠
閣深嚴孤蹤寡迹不揣拮据已四年于茲矣輔

臣員缺屢懇 皇上之登庸 皇上亦屢以簡
用許臣特因慎重其事需徐未果伏想咨詢必
已加博掄擇必已加精日月之明容光畢照選
衆而舉臯陶旁求而得傳說正今日事也凡海
內之捧表而來者祝 聖人之壽觀上國之光
堂堂天朝濟濟群彥而燮理寄之虛位巖瞻移
之薄躬何以慰夢卜之人情乎華夷之物望乎
臣每逢佳節倍切瞻依際此壽辰尤深慶藉仰
承殊賚有難縷數時蒙下採亦無吐棄儻僥鑒

允亟簡二三名碩列在樞機俾臣得奉身周旋
規隨從事庶幾大政大謀少所僨壞有俾九鼎
之重長奉萬年之觴此臣所藉手以報 皇上
而亦 皇上所以矐臣之最深者也祇候 明
綸不遑朝夕惟 皇上憐念

八月初九日上

乞免蘇松欠糧官追罰揭帖

伏蒙發下戶部查叅蘇松二府拖欠金花銀兩
自十四等年該任撫按等官職名令臣票處臣
已擬上又命改票臣看詳得蘇松二府逋欠固
多然自十四年到今其時不為不久日復一日
歲復一歲積漸至此愈久則愈難完勢固然也
朝廷錢糧取給于蘇松二府者居天下十之五
六殊稱疲累今但見其所欠者多未察其所供
者不少耳江南于萬曆十五六七八年間連歲

大荒救死不暇錢糧安得無欠自後元氣彫傷
不能一旦而復帶徵安得不多今戶部缺乏有
此查叅然其䟽中亦止擬同知以下等官住俸
催徵蓋雖欲盡法而亦不能盡故也䟽中所開
官員幾及半百若盡行加罰則十餘年中蘇松
官員不論賢愚大小俱被處置驚駭天下觀聽
似為大甚無論其他即如趙可懷乃親奉皇
上眷知特遣輯綏楚地者也江鐸正征播有功
又平皮林惡徭屢上捷音者也未有優異而槩

以舊任追罰豈不灰任事之心而傷待臣之體
乎即部䟽亦言十五六七年等疊罹水旱災傷
以致不能如數其意亦非過求臣從寬擬亦似
非縱美臣既奉命改票今擬二十年以後管糧
官員各追罰俸半年使見任者知所儆戒其見
任者仍各住俸催徵已為從重若其撫按司道
均望 皇上推念姑免追罰幸甚惟或 聖明
至仁愛育臣民止從臣前票施行臣尤幸甚

十二
日上

獨任三載請增閣臣疏

奏為獨攝政幾忽滿三載比感竒疾益增顛危
懇乞 聖慈俯容避位進賢以重揆路事今月
初八日臣奏為華祝騰歡班行虛左懇乞 聖

明簡命輔臣以重國體事蓋臣恭逢 萬壽聖
節而因念古者三壽作朋之義思得耆英碩彥
䟽附後先共康壽域于無疆也祇候 恩綸未
蒙垂示曷任瞻仰曷任悚息臣自萬曆二十六
年十月首輔病告奉命典攝至今獨在于閣者

已三十六箇月矣臣子分誼詎敢言勞第以黜
幽鉅典而例論之亦既盈一考之數矣此何地
也臣何人也而日復一日歲復一歲以至于此
由今追昔不自知其罪狀幾何慙負幾何毛骨
凌兢魂夢錯愕七尺微骸不足以堪鈇鉞矣又
非惟罪狀當黜而已也臣自本月來忽感竒病
初左目頓生烟火光如飛星乃今黑青滿前大
者如車蓋小者如棋子盤繞蔽虧而不去甚妨
於視兩足常無故轉筋痛楚難忍每一舉發非

經時不解當其苦時雖欲撫摩無可着手此又甚妨於行也如此景象尚堪久視人世乎夫

聖主舉事無不為長久計者為長久計必事事先有其備有備無患古今格言閣務殷繁臣身單弱安可無二三僚窠以為之備此非所以為臣以為國也而况時之久遠如此臣之衰病又如此臣不自言誰為臣言伏乞 皇上憫臣衰病瀕危再難尸位賜之特恩准容致仕及早簡用名碩以重輔弼之寄以光天地之交臣獲釋

負即死瞑目不敢煩辭冒昧直陳無任懇切之

至

八月二十五日

請舉大典揭帖

題臣聞之詩有既醉之篇者太平之雅也其詞
曰君子萬年介爾景福此忠臣所以祝頌其君
者也下文繼之曰君子萬年永錫祚胤則願其
子孫之多謂夫上天錫善莫有大于此也又曰
釐爾女士從以孫子復頌得淑媛以為之配而
胤生賢子孫以相從也有斯干之篇者頌築室
既成之什也其詞曰築室百堵西南其戶爰居
爰處爰笑爰語美新成天子之宮規模廣大戶

牖或西或南居處甚安笑語甚適也下文繼之
曰吉夢惟何維熊維羆維熊維羆男子之祥言
吉祥善事當生聖子神孫於是室也又曰朱芾
斯皇室家君王言此聖子神孫者皆宜服朱芾
之煌煌而有室有家為君為王享福祿於無窮
也由是觀之自古忠愛之臣無不頌其君之萬
壽無疆者則無不頌其君之子孫萬億者必如
此而後快于人心故詩人舉以為祝今當萬
壽稱觴之時兩宮美成之日在廷臣子祝禱

同詞誰不願以此言進哉然迎禧導瑞啟天之
祥實自聖心一念始臣請以人之至情而推
言頌禱之義焉孟子云父子主恩又云男子生
而願為之有室蓋父子之間非但人所難言即
人子于父母前往往往有心欲之而口不能言者
惟父母曲體其心而早為之所此所謂至情也
皇長子以聰睿之性近強壯之年血氣既充天
機自啟非皇上至慈誰其體悉親父親子喘
息相通皇長子不望之皇上而誰望乎

皇上大婚及時故得 皇子甚早然是時 聖
母遣官祈禱已慮夫遲父母篤于愛子則必甚
愛孫而愛曾孫也滋甚人之情皆喜玩弄稚子
而春秋高者彌甚世人見孫易見曾孫難以其
得之難也既欲見之早又欲見之多此皆所謂
至情也 皇上為 皇長子大禮計過周必欲
備其儀文羅諸珍異以厚之推念真情不如早
諧伉儷之為適 皇上孝奉 聖母朝夕起居
集九卿之朝竭四海之奉推念真情不如早遂

含飴弄曾孫之為歡則此一禮也上體聖母
之情下體皇長子之情且不崇朝而舉矣臣
嘗攷之自邃古以至於今帝王之壽考昌後者
雖多而求其壽最高子孫最多者惟軒轅黃帝
周文王及我太祖高皇帝三聖人而已黃帝
二十五子唐虞三代皆黃帝子孫文王之子受
大國封者十七人當時諸侯同姓半天下皆文
王子孫我太祖高皇帝有二十五子今天下
宗藩載在玉牒者已十六萬位皆高皇帝子

孫帝王富貴已極無復餘望所望者惟子孫之多聖人之生皆精明強固而此三聖人者心思更加精明神氣更加强固故子孫更加衆多此皆因時舉禮率孝行慈詩所謂釐爾女士從以孫子有室有家宜君宜王者三聖人寔享有之非虛詞矣 皇上體氣原充盛起居又善節宣爰際壯齡毓祥開胤若婚以時和氣周浹今年先完 皇長子大禮明春以後挨次舉 諸皇子各禮以篤父子之恩以示長幼之序以慰中

外之望以啟祚胤之源子復生子孫復生孫坐
見本支之盛享令名而集完福遠比黃帝文王
近紹我高皇帝自是皇上能事何為久窒
其源而不開屢讓其福而不受此臣之所未解
也茲萬壽稱觴之時兩宮美成之日即天
之善頌善禱者孰能加于此言之外惟皇上
細思而亟斷焉夫情至于必不容已不如明示
之之為快禮至于必不可已不如早行之之為
安此一大典者無論遲速畢竟當舉早一日則

聖心早欣瑩一日遲一日則聖心多焦勞一日臣不識皇上何所猶豫于中而長此縈迴展轉也特不定耳一定即無復事矣臣為皇上心腹之臣不敢不委曲想到惟皇上細思而亟斷焉臣無任懇切祈禱之至

萬曆二十九年八月二十九

七日上二十九日奉

聖諭諭次輔朕覽卿奏悉見忠愛誠懇至意深合朕心嘉悅不已前月諭卿本欲舉行但朕壽日禮儀叢多少俟即日降諭擇日舉行所奏已知道了

回聖諭催發揭帖

題八月二十七日臣具揭引詩人既醉斯干之
義仰致頌禱祝願之誠望 皇上早舉大典益
隆 聖壽弘濬天潢比于黃帝文王暨我 太
祖高皇帝之盛造次陳詞蔓延無次方深悚惕
靡敢寧居昨二十九日詠文書官冉登捧出
聖諭諭次輔朕覽卿奏悉見忠愛誠懇至意深合
朕心嘉悅不已前月諭卿本欲舉行但朕壽日
禮儀叢多少俟即目降諭擇日舉行所奏已知

道了欽此宸翰輝煌出自親灑 聖衷悅懌藹
然滿篇臣叩首捧讀不勝感仰不勝慶荷臣惟
帝王之興富貴其所固有聲名亦自灼然惟壽
命之悠長與子孫之蕃博為出于天之所制雖
窮富極貴盛德大業如帝王有不能强者然聖
人修身繕性未嘗無延壽之方厚典敦倫未嘗
無衍宗之術若不以葆攝為事而求年齡之自
長不以鞠育為心而求本支之自盛猶不耕而
求獲理所無也臣厯攷邃古以迄于今享遐壽

而衆子孫者不可多得五帝之中惟黃帝三王
之中惟文王漢唐宋以來惟我太祖高皇帝
宇宙昭垂獨三大聖此三大聖者不但鍾天靈
秀握至道之真詮抑亦建人紀綱裕貽謀之善
計故也黃帝之事遐哉邈矣然古今稱養生者
歸焉而禮儀文明寔從帝始文王雖雖肅肅亦
保亦臨與夫刑家御邦啟昆裕後者詩書所言
甚多至我太祖高皇帝身範之嚴動遵禮制
家法之正宮庭秩如祖訓所垂實錄所載歷

萬年一日也所謂至道真詮貽謀善計一顧諟
而見于前矣以 皇上天稟之厚龍德方中天
性之真燕翼咸正早成大典茂衍隆宗正在今
日愚臣不勝惓惓願我 皇上光纂三大聖之
後而超軼于百王之前者以此伏承響答慶幸
可言目今 聖節已過宮闈多暇寒溫甚適嘉
會惟時跂立下風翹徯吉旦伏冀早發以慰群
瞻臣無任踴躍抃舞凝佇之至

九月初
一日上

首輔永謝乞補閣臣疏

奏為首輔永謝閣務無統懇乞 聖明亟簡元
僚廣延衆正罷黜庸駑以重政幾事切照首輔
志臯以今月十三日病故除臣已題知奉 旨
傳禮部議卹外臣惟自萬曆二十六年十月以
來首輔長告獨臣奉命直閣屢懇增員未蒙
聖簡乃其時閣事之大者臣猶得諮請首輔而
行一應題奏臣綴名首輔之末語必稱臣等日
夜望其再起而覩同寅協恭之舊也今不幸亦

淪謝矣臣真成孤立無餘冀矣䟽附後先僅存
形影規隨謀斷取辦胸臆即章奏文移之中更
無臣等字樣實增股慄又可傷心若不及時簡
命則流傳夷夏必謂朝廷之上賢才衰落無一
可用之人如此政本空虛狎加凌侮豈惟百官
無所表率萬民無所瞻依而夷狄盜賊且生無
忌憚之心矣臣自揣庸疲奉職無狀代庖多闕
當路非堪老成既已凋殘小醜行將顛隕徬徨
四顧痾瘵轉加伏乞俯賜矜憐允臣致仕歸田

退安愚分取簡耆英以重端揆廣延諸彥弘資
贊襄在籍在朝惟聖主命庶全愚臣終始而
國家羅有用之才起非常之績矣九月十五日奉
聖旨朕覽卿奏具悉忠愛懇切朕素知卿忠貞清
慎且國家多事委任方殷豈忍恣然言去宜慎加
保養調燮贊襄以副眷倚至意毋得遜辭簡用閣
員已有諭了該部知道

諭行典禮回奏揭帖

題九月十八日二鼓時伏蒙傳出

聖諭封發輔臣一貫寓所諭內閣朕以皇長子及諸皇子冊立冠婚典禮前已有諭候旨舉行即今皇長子容貌充實書倣進益其諸皇子年齡漸長前項典禮昨朝聖母面奏舉行諸禮

聖心嘉悅卿便傳示禮部查遵舊制擇日具儀來行欽此到臣臣即焚香北望叩頭恭領不勝欣忭不勝鼓舞仰惟皇上天性真純至誠高

厚念元良之濬瑞昭佑啟之宏圖發自淵衷斷
于頃刻皇彝帝範增祖宗世守之光子繼孫
承衍廟社萬年之慶除臣即刻傳示禮部欽遵
外謹奉聖諭尊藏閣中以垂示罔極謹具回
奏以聞

九月十八日上

頒三十年曆賀揭帖

題臣聞聖人有言王者必世而後仁宋儒解之
曰三十年謂之一世王者以仁義禮樂教化天
下日濡月染必至三十年而後習熟于人之耳
目淪浹於人之肌膚舉天下而游于熙皞之天
可以稱仁此帝王道化之盛軌也 皇上神明
御宇今日廷頒萬曆三十年大統曆日臣見大
小臣工鱗集闕下莫不歡呼鼓舞以為 皇上
當鼎盛之年成久道之化所御之曆乃古帝王

未有之盛際所成之化乃古帝王未有之極功
況時至事起天人合符禮備樂和宮府交謦自
今年以往 皇上萬萬歲壽則無疆之寶曆益
昭布于華夷無外之治功益磅礴於遐邇當不
特如今日所成臣謬玷班行側聽輿論私心慶
幸萬倍恒情自媿累塵不能增泰山之高累滴
不能增河海之潤惟願 法天行之健勵不息
之貞自今以前三十年如一日自今以後億萬
年如三十年則道化愈隆洪基永固大業冠百

王鴻名照千古矣臣觀堯舜之朝治定功成而
君臣未嘗不交相儆戒乃歌曰元首明哉股肱
良哉庶事康哉又歌曰元首叢脞哉股肱惰哉
萬事墮哉蓋兢兢業業不敢荒寧如此臣敢誦
之頌 皇上為堯舜之君而臣亦竊附為堯舜
之臣是以頌不忘規惟 聖明留意

十月初
一日上

請吉期進冊文揭帖

題臣惟大典之行恭承 聖斷諭下之日臣民
無不歡呼萬歲者今封號定于 宸筆悉皆美
名儀注又蒙 允俞人人講習惟吉期尚未發
耳本宜靜聽但各衙門備辦所須之事即臨期
倉卒猶可取齊惟臣所掌冊文詔書等件必先
撰稿進呈恭候裁定冊文則發臣督視中書官
寫金冊進內府製造覆奏行詔書則發臣督視
中書官寫黃箋進到御前覽發至期行輟轉經

多非一日可辦若不預備臨時誤事不小謹先
將冊文五道擬草上進臣學疎才淺語不成章
伏乞大加筆削以光典謨仍祈早發庶得次第
奉行不勝翹俟之至

十月初四日上

回黃河決責問揭帖

題伏承 皇上垂問黃河事情臣聞黃河謂之神河衝徙不常最難測度商時因河決遷王都以避之者五世盤庚作書三篇以告諭臣民漢時言河決乃天數武帝自臨塞河又言治河之法不可與水爭地故治河譬之禦虜最難為力先年所決之處又非今時所決之處意不能料力不能防似難一一責問但當隨時補塞今見任河漕大臣劉東星因此憂瘁殞身若前事有

失科道官及劉東星豈不能奏劾又若易于補
輯諸臣豈不能各獻良策而河臣亦何至于束
手待斃為今之計第宜及早命官不惜財力以
收後功乞將會推亟點刻期催任拯溺救焚此
之謂也

十月初四日上

請上 徽號揭帖

題臣查得萬曆十年 皇子誕生彌月尊上

聖母徽號茲逢大典告成 皇上孝奉 慈闈

以天下養百順承歡超逾今古宜仍諭禮部具

儀行禮容臣閣中備辦冊文詔書等件又查得

皇上請 聖母宴會有奏書致語今次容臣撰

進以備用俱候裁示庶便遵行

十月初八日奉

聖旨朕之尊上 聖母徽號出自孝誠覽卿所奏

正合朕心具見君臣一體忠愛至意已有特諭了

其宴會奏書致語卿可照例恭接具來

進冊立詔草揭帖

題昨蒙 皇上發下冊立冊封選定本月十五日大吉之期臣民頂戴不勝歡祝除冊文五道臣先已進呈外今擬合行詔書以進臣惟今日至十五日止有七日冊文尚須內府製造金冊詔書尚須中書官寫黃箋俱再進 御覽始發

日期甚迫望

皇上早賜裁定

十月初八日上

詔條三事揭帖

題臣所擬詔條與部院公同商確悉係常行事
宜無甚增損至于赦罪一節臣今增擬云原奉
欽依及詔獄罪犯開具奏請定奪充軍為民一
節臣亦增擬云有奉特旨者具奏定奪此皆臣
不敢朦朧之意外有三事必須發自聖心臣
不敢擅入詔內另開以請如蒙許允入詔內
行此三事者群心禱祈甚切萬代瞻仰在茲苟
可少延歲月臣亦不敢輕瀆但今事勢窮極千

載一時之賚恩首宜及此跂望之誠同于時雨
降黜諸臣壯者老者死含悲泯沒深可哀矜
而四方百姓窮愁到骨若無以慰其望或生他
變亦不可知臣尚未敢盡求起用盡求蠲除但
調停酌于分數多寡之間亦易俯從者也 皇
上至仁如天至明如日儻從曠然施恩廓然普
惠盡撤內臣悉召起用尤出臣意想之外真大
聖人之作為愚心未嘗不切禱焉謹題候 旨
一大典既行先年有因議禮降黜者懲創已久

吏部開名具奏敘用其餘因事 欽降罷斥官

員吏部訪擇可用者分別等第查開職名議擬
上請若奉 旨充軍者兵刑二部查其所犯情
由議奏定奪 一礦稅原旨權宜暫行今已日
久本該停止但國用尚未充足姑從酌處各差
內官會同撫按官查看礦脉已竭者牢閉塞不
得虛工包賠稅額太多者查實奏聞量情減徵
行撫按催解若有匪人投充生事害民侵官者
拏問究罪勿貸 一各處織造除額供毫不減

外其加派數內有節年拖欠未完者該部查請

量免補解以寬民力

十月初八日上

催允行取官揭帖

題竊惟行取一事自萬曆二十六年十月發自
聖心命吏部行取考選今已滿三年矣諸臣離
任待命盤費罄竭而科道員缺太多差遣不敷
政務廢弛奸弊莫清在彼則積于不用在此則
苦于缺用故部院不憚煩瀆屢䟽請旨臣觀近
日溫純題內但望酌量點除伏望俯從其請親
賜御筆酌量點用亦明曠蕩之恩而慰諸臣之
意也臣不勝惓惓

九月初
九日上

回徽號諭札揭帖

題今日文書官金忠恭捧

聖諭到閣諭內閣朕以冊立冊封禮成天下頒行
國家大慶聖母在上鞠育朕躬恩同天地實
自本源理宜尊稱徽號顯揚朕之孝誠卿可傳
示禮部查遵舊制擇日具儀來行欽此臣不勝
欣慶仰見皇上大孝因心尊親至情惓惓罔
極即刻傳示禮部欽遵外謹奉聖諭尊藏內
閣以垂永久謹回奏以聞

十月初九日發
下本日回奏

諫冊立政日揭帖

題今日文書官冉登傳出司禮監太監田義等
一本內開冊立冊封等擇到十月十五日卯時
吉合用冊寶冠服等項錢糧未完催各衙門無
分晝夜上緊趲造等因臣已擬票上進再蒙發
下改票傳諭錢糧未完着另改日期臣聞命之
頃不勝震慄竊惟冊立冊封 皇上最喜慶之
事國家極重大之典 成命既下 天地 祖
宗百神咸舞蹈欣躍環拱而待矧伊萬方華夏

黃童白叟豈不日夜引領而瞻俟乎忽聞改日之命天下將謂非詆衙門遲誤之罪必有他端更張之故此其疑議更多于前命未下之時紛然滋起中外橫溢自今以後殆不能一刺無瀆擾矣臣伏思之聖主以儉德先天下教子孫即錢糧未備服御稍欠不失為帝王盛德惟是命令大信彛章大禮豈得有所二三皇上素重詔旨未嘗一毫爽改安可以遷易之辭從今日大禮始臣于他事無不祇畏順從獨此事為

天地鬼神所鑒臨關天下萬世之公論帝王一
言傳之萬古輕加擬改必陷明主于有過之
地臣萬死不敢伏鑕待罪惟皇上俯賜諒察
仍依前定吉期從儉從簡亦不為失適足以光
揚聖德也必不得已則請暫借該衙門錢糧
備用禮成之後容臣與在朝諸臣竭力處置嚴
督戶工二部剋期補還如不從時當與天下共
處以法亦足以重國體成大典有辭于郊
廟百神而副海內蒼生之望矣臣不勝戰兢昧

死上陳伏冀

聖明鑒納

十月十一日上

封上太監田義捧入跪振掉伏不能起

上親為取覽良久乃命曰傳語各衙門
辦具有一不備者聽打發南京於是局監
始議製造云時十一日暮刺矣上復自
語云如改日無奈紛紛者當復起也

催發冊文詔書冊寶揭帖

題臣昨日冒昧進言不勝悚惕今日百官集于
文華殿演禮群心鼓鬯皆呼萬歲皇上命司
禮監官監視仰見聖心歡豫吉期無改臣不
勝慶幸伏想天地社稷宗廟之靈咸僖皇
上祭告之禮而徽號早上一日則聖母之心
早歡悅一日又昭皇上大孝尊親之盛也臣
今拱候而甚急者冊文五道詔書一道俱在御
前未發冊文尚須發該監鑄字詔書宜發中書

官寫黃俱非倉卒能辦伏乞即賜發下幸甚幸甚臣又惟金冊金寶宜勅該監一面將別項錢糧通融借造一面催該部急進補還惟天語丁寧着衙門日夜通融造辦即從淳樸亦昭聖德貽謀之盛其寫黃事不可再遲詔條之中儻有未合聖意者望且以御筆留起待微號禮成尚須詔條是時臣恭擬候裁亦未晚也臣不勝顙俟之至

上十月十二日奉

聖旨朕覽卿奏已知道了其冊寶未有金兩該監

尚未鑄造且典禮隆重至期權宜或用冊文寶文
行禮造完補賜可否卿還詳查奏來

回補賜冊寶可權宜揭帖

題今日臣具揭上奏伏蒙 聖旨朕覽卿奏已知道了其冊寶未有金兩該監尚未鑄造且典禮隆重至期權宜或用冊文寶文行禮造完補賜可否卿還詳查奏來欽此臣惟 皇上冊立皇太子冊封 諸王天性至情真仁篤愛立彛倫之極厚本支之慶甚盛德也夫禮有實有文冊寶雖重尚是儀文造完補賜有何不可在舊典雖無可查在聖賢行仁之術臣敢不將順奉行

望 皇上即發冊文容臣一面以黃箋寫就冊
文寶文權宜宣讀以成大禮其 詔書亦乞併
發寫黃及期頒行使四海之內咸誦 聖明同
呼萬歲幸甚臣又聞昨日戶部議進金兩不知
足用否倘可并鑄或先鑄各寶亦完一事今上
徽號在適當鑄 聖母冊寶乞催該監將前項
冊寶上緊一齊造完至上 徽號之日悉行補
賜亦所以歡 聖母之心慰 諸皇子之望也
臣不勝惓惓

十月十二日
上十五日奉

聖旨朕覽卿奏具悉忠敬詳慎冊寶辦造遲悞內外經管官員都著該部查叅了來其未造完者權用冊文寶文行禮還着上緊造完恭候 上聖母徽號之日御前補賜該衙門知道

犯諱自陳揭帖

題臣檢詳 惠王冊文中用有一字偶犯 成
祖御諱臣實踈略罪何可辭今擬改為華萼相
輝文義亦妥惟復 聖明欽賜更定臣俯伏俟
罪謹以原文并改揭進上伏候 旨勅

十四日奉

聖旨朕覽卿奏具見忠慎目今章奏繁多卿宜用
心輔政以副眷倚至意既檢詳着改正行

謝揭帖

題臣擬 惠王冊文偶犯 成祖御諱具揭自

陳奉 聖旨朕覽卿奏具見忠慎目今章奏繁

多卿宜用心輔理以副眷倚至意既檢詳著改

正行欽此除冊文當蒙欽定改正外竊惟臣疎

略有罪自知難逃 皇上不但寬臣顯罰抑且

賜以 溫綸豈勝慚悚豈勝感激自今一切章

奏敢不殫竭心思圖副委任但臣才智既緣天

限精神又逐年衰端恐悞處猶多終不自覺虛

蒙忠慎之褒而終蹈鹵莽之罪則臣所大懼也
惟 皇上睿思精詳時厯訓勅庶策不敏之質
免明時之羞

十月十五日上

言查叅之旨難發乞寬宥揭帖

題今日 皇上冊立 皇太子冊封 福王瑞

王惠王桂王嘉禮備成頒詔天下天日熙和雲

物昭朗百官萬姓及四夷之在闕下者罔不歡

忭踴躍共呼萬歲此真 皇上億萬永齡之符

亦萬億多孫之兆也臣不勝慶幸不勝祝頌早

間太監田義捧發臣所奏揭帖奉 聖旨朕覽

卿奏具悉忠敬詳慎冊寶辦造遲悞內外經營

官員都着該部查叅了來其未造完者權用冊

文寶文行禮還着上緊造完恭候 聖母徽號
之日御前補賜該衙門知道欽此臣方以孤陋
踈略自媿自咎安敢當 皇上忠敬詳慎之稱
誠惶誠悚竊惟典禮以九月十八日命下內外
經管官員咸宜夙宵恭事何至再旬之久而冊
寶未成致 皇上殷念議以冊文冊寶權用行
禮典守謂何臣允宜欽遵 明旨傳該部查叅
遲悞之罪但臣愚意旨中有數字似不宜傳外
者輒此覆請蓋臣此揭係十三日早上是時冊

寶委未造完故

皇上有權用補賜之旨至于

昨日臣會同司禮監寫篆五冊寶俱全今日蒙
賜行禮矣而尚云權用補賜恐外人不知便謂
今日典禮雖行而冊寶未備將 皇上殷勤催

督美善無盡之意遏而不明傳之天下萬世益
致訛舛似為不便臣愚請 皇上另發一旨未

知是否謹題候旨臣又惟典禮既成神人胥慶
詔書頒行有罪者尚在寬赦今冊寶已備但少
精純而儻蒙 皇上俯賜含容將此嚴旨免發

則天下萬世惟稱 聖斷美成而纖瑕罔累豈
不為盛德大業之至臣受眷倚厚恩欲睹唐虞
至治不避擾瀆竭盡愚忠惟 皇上涵亮十五

日
上十
九日
奉

聖旨朕覽卿奏已知道了前旨免發收存閣中特
諭卿知

請發徽號及儀注揭帖

題恭遇 皇上加上 聖母徽號臣謹欽遵恭
擬二號進呈未蒙定發臣職掌冊文奏書詔書
等項并各衙門應行典禮恐臨時辦理不前伏
乞 聖明裁定并禮部擬上儀注發下令臣等
次第奉行早成尊親盛典以慰 聖母之歡心
以昭 皇上之大孝

十月十七日上

催點河漕督撫揭帖

題臣頃得河南及鳳陽各巡撫報言黃河決于
歸德地方盡趨東南潛入淮泗而黃堦斷流徐
邳淺阻回空糧船不得回南明年新運已見稽
悞漕渠不可收拾矣且不獨妨運而泗州祖
陵又有衝擊浸沒之憂此燃眉最急務也總督
漕河大臣既缺已經再推望 皇上早賜遴用
責令刻日到任趁今整理以遏汎濫之虞且防
春水之發 祖陵幸甚運道幸甚

十月十八日上

回 聖諭揭帖

題臣十五日所上揭帖今日文書官冉登捧
聖旨朕覽卿奏已知道了前旨免發收存閣中
特諭卿知欽此又奉 聖諭諭內閣冊立分封
典禮朕遵 祖宗制度家法自然次第舉行祇
緣 皇太子氣質清弱屢旨少俟何乃憚邪畜
物故逞私臆沽名邀功意欲離間瀆阻今春朕
見皇太子氣體充實書倣進益朕心嘉悅且又
內外仰體靜聽朕命即於二月吉期移居屢傳

各該衙門查照舊例上緊造辦應用錢糧何以
至期冊寶雖備中有尚未精純其餘器物等項
遲悞槩可知矣科道言官未見一語催叅公私
顯然職守安在其造辦冊寶冠服內外經管官
員卿可傳示便着該部查叅明白具奏欽此臣
叩頭恭誦備領 皇上舉行典禮之由一見恪
遵 祖宗家法之誠一見體念 皇太子天性
之厚一見旁鑒大小臣工靜聽之招一見始遲
終速各有所宜乾健之斷詳明周至具昭乎詞

又以內外衙門辦造悞遲特令查叅無非為深
愛皇太子而發臣即遵奉傳示該部施行惟
望聖度天容聖慈海浹以成大慶之美以迎
滋至之禮所奉諭札尊藏閣中傳示永久謹

具回奏聞

十月十九日上

是旨傳示戶部尚書陳渠奏云罪宜坐臣安
能漫委諸經管官上為之留中不報

言徽號不宜四字揭帖

題臣所擬加上 聖母徽號有二請旨點一奉
聖旨朕恭覽卿擬尊上 聖母徽號四字俱全用
以顯誠孝尊崇之意欽此臣候命日久竊疑
聖孝真切旦夕為遇而何需遲若是乃奉今旨
始知欲兼用四字此真 皇上誠孝尊崇至德
但臣惟自昔徽號皆以二字遞加不為不尊矣
祖宗相傳著為成憲其在今日所宜恪遵臣職
司典籍不敢屑越撓禮執奏臣之分也儻 皇

上俯從轉移乃盛德事伏想連日遲回正由于此欲加則祖制有定而不可踰欲不加則

聖心已發而不可遏皇上亦明知其不安矣為孝而過于禮似不若無過為更佳耳臣如不言必有議臣後者欺隱之罪何辭顧今時日甚迫不得更遲惟即賜乾斷以便遵守謹題請旨

十月二十六
日上本日奉

聖旨朕覽卿奏具悉忠慎尊上聖母徽號恭用四字本自朕之孝誠還着遵旨行該部知道

謝特賜揭帖

題該文書官并登捧出

聖諭諭元輔朕今日恭進 聖母冊寶意欲召見

先生但朕連日動火聲音啞岔又且未便天寒
賜先生伏薑一盒甜食二盒燒割一分特此諭
知欽此臣恭誦 溫綸肅拜腴賜叩首叩首何
勝感激伏惟 皇上至孝尊親崇脩彝典重闡
歡豫合宮喜慶斑斕五采拜起千行真世間希
逢之樂事而人子極快之至情也臣竊在班末

仰窺 聖顏和豫如春喜見眉宇所謂孝子之
心有深愛者必有愉色有愉色者必有婉容昔
嘗誦之今覩見矣久隔起居幸此瞻睹欣忭已
極而伏承意欲召見之旨拳拳垂接出臣望外
感極欲舞何幸如之況辱天寒之念多品之惠
又辱先生之稱非分之寵宛然家人父子至情
也身蒙殊眷捐糜何酬仰惟 皇上天儀玉表
龍德正中元氣攸鍾陰陽所會顧保身大孝之
本調攝自不可廢水火既濟則火不獨炎心清

肺寧則聲音洪暢固不獨服食之力尤貴有靜
養之功伏乞謹護風寒慎調寢膳以副皇天之
屬望以慰 聖母之眷懷區區愚忠惟此一片
以謝如天大賜

十月二十八日上

賀徽號禮成揭帖

題今日 皇上恭上 聖母徽號親獻冊寶百

官萬民舉欣欣快覩 龍鳳之姿天日之表

穆穆皇皇尊嚴和暢覩羽旄之美者若遊碧落

而捧玉皇聆管籥之音者若張洞庭而御軒帝

也衆心之愛戴如此萬方之謳歌可知蓋 皇

上三十年厚澤深仁淪肌浹髓而今者垂裕之

令猷尊養之隆典周旋曲折罔不中禮故聞者

誦德見者醉心手舞足蹈之間言語揄揚之際

自不知其所以感矣臣永願 皇家和氣天壤
周流 聖壽萬年日奉 慈極瑤池之樂子孫
千億長培 國家磐石之安更願舉親睦以協
萬邦致中和而成位育時臨宸座延見吏民天
聲玉表從發瞻聽湛恩明威震曜下土竊津津
然希冀之焉古者謂內外興治四夷賓服之類
為人瑞品物咸亨四靈畢至之類為天瑞今典
禮備成禧事交洽天人合應家國同禎能不拜
手稽首入告于上謹具題稱賀以聞

十月二十
九日上

請福王婚禮揭帖

題本月二十四日蒙發禮部題請 福王婚禮
一本臣謹票擬上進伏候數日未見允行臣惟
福王茂齡十七正及婚時今 皇太子婚禮將
行宜妙選 福王賢淑次第成禮臣前恭祝
皇上聖壽無疆弘開胤祚上同 太祖高皇帝
百二十一孫茂衍天潢建封萬國今維其時似
不可緩伏乞早賜批發使各該衙門欽遵施行

十月三十日上至十
二月二十八日奉

聖旨朕覽卿奏具見忠愛婚禮候旨行福王且着
出閣講學擇日具儀來行禮部知道

大典成加恩辭疏

奏為 聖謨獨運大禮告成非分蒙恩覲難承
拜乞賜收回以光慶典事吏部接出 勅諭勅
吏部尊上徽號禮成冊立冊封告完內閣輔臣
贊襄密勿勤勞懋著一貫加無太子太傅進建
極殿大學士廕一子與做尚寶司司丞還賞銀
五十兩綵段二表裏餘官如故照新銜給與應
得誥命如勅奉行欽此移咨到臣聞命自天措
躬無地惶悚惶悚臣惟 皇上薦愛 元子正

位東儲一體 諸王並分赤社加上 聖母徽
號以表純孝誠敬上聖之完德垂永之顯摹也
臣歷思往事締詳始終無幾微不本于定籌無
毫髮不經乎神運小臣屢喧而不搖大臣亟請
而弗拂天明日皦本絕他端岳峙川恒更無中
異遂令疑心橫口旋起即消天性真機聞為彛
典穆然永念劃然丕建雄斷行于一朝德業峻
于千古並命之中而先後較若同冊之口而輕
重有倫 皇極建而宗廟社稷咸安天敘昭而

父子兄弟足法上慰 聖母之懸屬下騰萬國
之同歡罔極之報于焉而酬不匱之施于焉而
錫實非臣一口所能揄頌亦非臣一詞所嘗贊
襄者也夫臣不能贊襄一詞而 聖諭以贊襄
行賞則 皇上素重輔弼延及微臣耳臣雖不
敏自審亦明胡敢冒顏妄承貪榮取誚乎儻
皇上以恩詔再頒德施四洽謂臣旦晚趨蹌亦
萬分一之勤勞也則臣請渙忍受銀兩表裏之
賜于德甚弘于臣甚侈矣乃若加無進殿玷崇

峻之階任子誥親辱光裕之命揣分為累堅遜
斯宜伏望察臣惓誠無少矯飾憐臣素志有萬
凌兢俯容辭免俾守舊官庶杯盂之量不盈而
傾覆之虞少逭臣無任瀝懇仰祈之至

十一月初二日

上初四日奉

聖旨大禮告成朕心嘉悅卿居政本朝夕贊襄勲
勞懋著加恩示酬實遵彝典卿宜祇遵成命不必
遜辭該部知道

再疏

奏為隆恩誤及內揣增慙再瀝懇辭伏冀俯俞
以安愚分事茲以大典告成 皇上推恩及臣
進殿加兼廕子錫誥及賜銀兩表裏除銀兩表
裏臣不敢固辭容恭領廷謝外其餘異數具疏
辭免奉 聖旨大典告成朕心嘉悅卿居政本
朝夕贊襄勲勞茂著加恩示酬實遵彝典卿宜
祇遵成命不必遜辭該部知道欽此臣素拙脩
詞不能自達威顏咫尺益用囁嚅誠不曰天敢

忘再瀆仰惟大禮之行出自宸斷臣第有將順
毫無贊襄前䟽備陳茲不復縷惟是臣之愚情
有日夜兢兢迫切五內者敢一吐露於君父
之前始臣遭遇聖明起家赴闕時則有三輔
臣在前臣濫竽其間優游伴食尚未見短也不
謂數年以來三輔皆盡遽以次授俾臣代斲爰
而計過殆不勝書然猶謂暫時權攝非久息肩
耳不意皇上遂倚以為真頃奉諭旨有先
生之稱元輔之目人為臣喜臣為身危晉陸玩

有言以我為三公是天下無人也每于恍惚之中
惆悵之際自謂必當解釋理無久居又自謂
求多實難求寡良易而不意有今日之殊錫也
兼宮傳轉極殿廕符丞皆真首列之恩不惟不
可解釋而復益以繫縻夙懷愈左行將若何臣
反覆思念俠士殉節匹夫許身臣以孔子為師
以皇上為父義重恩深敢懷返顧惟是骨寒
福輕才謏德薄而據高增殆取多速顛下愧所
學上羞朝廷耿耿徊徨良非過蕙伏望皇上

深憫曲全收寢前命姑待臣績用稍彰粗逃譴責然後次第量賜始為稱情於賞格非踰於國恩非濫不然臣近在密勿而獨取過豐非所以示臣民光聖世也臣無任懇悃祈望之至

十月初一

五日上初
六日奉

聖旨朕覽卿奏具悉忠慎大禮贊襄加恩彞典卿宜勉遵成命益展謨猷弼成化理以副眷倚至意慎勿固辭該部知道

請出閣講學揭帖

題恭惟 皇上大德敦倫訏謨啟後冊禮冠禮
相續舉行一月之中臣屢奉事于班末伏覩瑞
靄與群情交暢祥輝及喜氣齊騰人文物采燦
然有倫品式章程郁乎備具 皇太子睿姿宣
朗雅度莊凝端冕垂旒允恭克讓 諸皇子龍
光鳳儀金相玉節詵詵振振既衆且嘉仰見
皇上種德甚厚積慶甚宏源深流長光啟來胤
又見 皇上教家有素訓迪多方聞禮聞詩咸

正罔缺况茲一時畢行衆禮少長咸在不煩再
舉此滿朝簪紳所以為 皇上嵩呼萬壽而臣
忝密勿尤舞蹈不自喻者也然臣區區忠愛尚
有一焉臣聞之良玉不琢莫昭其采良金不鍊
莫耀其光雖琢之而不磨猶之乎未為珪璜也
雖鍊之而不鑄猶之乎未為彝鼎也然則學不
可已尤不可懈故語曰愛之能勿勞乎說命曰
惟學遜志務時敏厥脩乃來臣額繼自今以往
皇上特命 皇太子嘉禮既成日懋講讀無忘

厥初 諸皇子春日載陽次第出閣以就外傳
臣雖至愚敢不夙夜率屬敬進古聖賢之明訓
以仰成 皇上垂裕貽嘉至意臣不勝慶忭祈
望之至謹奉賀并請

十一月十一日上

拜命陳謝揭帖

題本月初一日准吏部咨傳奉 聖諭 徽號

禮成冊立冊封告完內閣輔臣贊襄密勿勤勞
懋著一貫加兼太子太傅進建極殿大學士廕
一子與做尚寶司司丞還賞銀五十兩綵段二
表裏餘官如故照新銜給與應得誥命如勅奉
行欽此臣辭不獲命謹于十二日赴鴻臚寺報
名今早謝恩訖伏念臣天壤孤生山林獨物逢
時適合遇主太奇初無紹介之先容默契淵衷

之特簡歷賜華貫經筵孤卿首戴足騰莫非異
數而又誥廕稠疊上及祖考下及妻子凡夢想
不到之事臣皆于身得之如此恩知若為報稱
臣每自揆度恨非其人而遜避雖勤拜承終侈
徒存微抱竟昧本心是以今命下日再具疏辭
非臣好煩誠有慚歎故也 皇上誤愛方殷答
溫愈渥則臣欲復辭而不敢辭欲輒受而不能
受連日徘徊罔知所措乃今則竟包負乘之羞
靡顧在梁之誚矣感極涕零欲恭陳一謝而令

甲廷謝之臣無本謝例則臣又不敢創起以開
虛矯之端鬱此至情無由自達敢進此揭以表
九頓之忱不勝佩結不勝依戴臣賦才不長值
今多事因循故習恐無益于事幾稍涉權宜終
有妨于禮法惟知事君者以安社稷為忠以陳
仁義為敬不可告于天者不可言于君無愧于
先皇斯無愧于萬世臣雖至愚心切慕此即微
少效可自靖于國家誓此寸心必無欺于君
父所患狗馬病多令狗馬心左懷茲眷眷不勝

惓惓頂踵可損無言膚髮謹具題恭謝以聞

月十三
日上

言河漕揭帖

題臣接御史高舉揭帖為直言天下第一要務等事內言河漕利害竊謂其言可采蓋京師受天下轉輸歲以巨萬計上奉至尊官府下贍億兆軍民天下重務孰大于此而所經由路第恃一線漕河耳漕河既徙則咽喉就塞而有絕粒之憂今年春夏間徐州一阻而二十萬糧遂不入倉若不急圖妨害明年之運三輔內地所在告荒太倉之米不支二年至于銀庫罄竭如

掃倘有揭竿而起脫巾而呼者何以弭之總河大臣已經屢催伏望皇上早賜點用督其刻期到任廣詢竭圖以救燃眉之急舉所言治河數策二三十年中屢聞之而竟無人能為者非財力有限即任事鮮人苟取一切治辦事了止矣至于今而悔之何益哉誠欲脩舉是在得人得人則功無不就而利無不興必特簡重臣隆之眷顧重以丁寧許以便宜始期百年無事若朝廷視為餘緩在下無復擔當矣觀䟽中言在

朝會推則有推諉在外會題則有推諉可見當事者之情狀而深為國家寒心也臣不避嫌忌特用陳奏望皇上少賜燕閒將高舉本省覽早點吏部會推仍嚴限催任處置漕事之急十

月二十
日上

催存問輔臣揭帖

題臣於本月十二日遵奉 聖母徽號詔書存
問原任輔臣申時行王錫爵王家屏擬勅進呈
未蒙批發臣茲另擬上請臣猥以庸劣遭際昌
期獨受隆恩正深慚悚敢不敬奉詔書弘宣聖
澤使前輔臣均受上賜少逭臣饕竊之譏齋心
丐求萬祈原照所有恩賜禮物似宜令該地方
辦備以免齎送之煩統候 聖明裁定謹題請

旨

十一月二十五日上

冬至謝加賜揭帖

題恭遇冬至令節臣詣宮門外叩頭慶賀伏蒙
皇上特恩管待賜茶復賜伏薑甜食各一盒燒
割一分寵私過厚晉錫有加曾微尺寸之能堪
此殊常之遇惟思糜骨仰報推心十一月二十八日上

言啟本不必批荅揭帖

題今日早蒙發薊州永平山海總兵官尤繼先
啟本四本到臣臣看詳前本係啟 皇太子本

原稱啟知與奏題進御之本不同不煩批發本
官遵禮部題奉欽依而行蓋祖宗設立此制但
欲 皇太子明習庶政以廣聰明使預聞之耳
若聽斷則 君父事非所預也以後此類 皇
上覽過似宜竟賜東宮存照謹封回奏聞

十二月初

上三日

請點總河大臣揭帖

題臣惟總河之缺屢推至十人矣尚未蒙點
中外惶惶此一官者非一人所易為亦非人所
樂為推而不點諸臣之幸非國家之福何也河
道雖一職而關係國家最大者有三其一則黃
水浸淮水而泗州祖陵被其患再緩不治
雖鳳陽祖陵亦當被其患夫祖陵國家王氣
之鍾也祖陵被患豈惟列聖龍蛻之藏不
安于地下而千萬年聖子神孫托根寄命于何

所無厚培濬發之祥而有波蕩震驚之虞靈秀
因之日傷福祚因之日衰矣彼庶民衣食之流
尚恐傷其先塋而愛其一草一木況帝王之
家所係如何重者可不日夜寶護而泄泄然乎
甚關宗社亦切 聖躬最不可緩圖者也其一
則黃水侵漕河而運道阻塞南來千萬艘停閣
不進京師之米糧日貴百貨日少三輔沙磧所
出幾何何以供六宮廩百官餉九軍九邊而育
養邦畿千里之民亂生輦轂其憂不細非社稷

之福也其一則河南山東徐沛之間乃中原都會之區譬之人身為腹心之位譬之人家為堂除之所此而昏墊為巢為窟耕耨莫施商賈不出則腹心潰而四支皆壞爛不收堂除榛而四隅皆阻隔不通故中原之民尤當愛護中原之地尤當懇闢不可令其陸沉如海而無完土非社稷之福也夫一河決有三大患奈何不蹶起而救哉今歲已盡成蹉跎矣再復蹉跎春水暴發患當若何一患已甚况其三乎諸臣仰揆

聖心似不釋然于先任河臣故需遲也夫功罪
炳于輿論威福制于至尊或究或容或遲或早
惟皇上命此一新命與舊臣何妨亟用其新
而往治事徐議其舊而斟酌處之固未晚耳何
為而緩其當務之急以滋燃眉之患哉從來比
河道關係之大于九邊比河工責任之難于禦
虜人臣既莫之任皇上又不令任臣實憂迫
如坐針氈若托之非其人或因之以為利不顧
利害之切身而第取錙銖之快意割肉而飫口

剖腹而藏珠此尤視國事若兒戲而計之至愚
萬萬不可用者也臣為此懼竭忠盡言亟點廷
推之外更無要術專委河臣之外更無奇策早
責成一日則早拯救一日使之講究利害之歸
處畫䟽塞之法事難遙度惟在得人此十人者
已拯一時之選惟皇上選擇而使之耳

五日
上

請發新閣臣辭疏揭帖

題本月十五日原任太子少保今行取沈鯉一本為再懇 天恩俯容辭免重任事該通政司封進未蒙發票臣惟沈鯉蒙 皇上特簡入閣同臣辦事 聖恩隆重不敢遽承再疏懇辭原係閣體今未覽發在 皇上萬幾未暇偶致稽留而在本官聞 命惕驚進退惟谷則來期逾遠閣務莫辦而臣益懷孤犢債軼之憂矣伏望皇上即賜檢下容臣票上覽發促其即來以彰

敬事立

卷二

優禮輔弼之意臣不勝瞻望惓惓之至

十一月十八日

上

請推恩補行取科道揭帖

題伏見慶典告成內外臣民莫不幸其為不世
遭逢也獨此行取各官尚有向隅之泣為大造
中之遺物敢請 皇上亦賜一恩蓋行取之臣
其視尋常職任及循資遷轉又加一等論年資
有歷十餘年與八九年者視他官更久論才品
皆屢經薦達與累書上考者視他官更優乃自
戊戌冬被命而來至今又三年尚不得一官則
視他官為更後落拓都門不儒不俗薪水僕賃

時亦不繼誠可憐也始猶慮其散僚外吏未識
朝廷體而不無妄發之虞今聚觀闕下歲月積
而諳練精矣始猶慮其驟登干進取膺仕而不
無輕易之失今靜居待除人老成而事持重矣
譬之藥材數經製煉之後郁烈之性都盡而精
華之美獨存效可奏矣况考選之時有四十九
員今見存止三十六員其人日少而兩京科道
近益寥落其缺日多都御史溫純每當換差那
東補西疾首蹙額殊非官盛任使之典計今聖

政一新萬方歌頌無復聒擾瀆阻之患當資䟽
附後先之力伏望 皇上乘此慶成普施德惠
特准部院所擬分補前缺則體悉周而銜感切
鬱積通而愛戴深必有體國奉公黜虛崇實之
臣為 皇上用者此真今日聖政第一之當務

也

十二月二十
十一日上

言武職既予封當聽辭俸揭帖

題臣惟國家典制署職官止支半俸不准授封
署職而加實授者謂之陞半級實授則支全俸
許授封但文官惟郎中之下有署職其不多
而其陞遷之時亦不論署與不署只論年資深
淺無大關係故恩詔中可得而許也若武官自
都督一品以下悉係署職非軍功不准實授實
授者不過百中之一二耳其官既尊其人又多
又當給全俸則費益不貲故屢次詔書多靳而

不許臣之擬詔遵守舊規非抑之也今馬棟等
陳乞之䟽蒙 皇上准照弘治五年例行此至
仁至慈一視文武德意甚盛但出自特恩則可
而臣則難以擅許故前票中有此委曲惟 皇
上亮察夫各官一䟽而既得封典又得陞官
明旨已下夫復何言但既實授即當改半俸為
全俸其人又多其官又尊其俸發自內帑費當
不止鉅萬豈得因一施恩而浪費無限不可不
聽各官辭免也且兩京武職不計其數其紛紛

援例許之則浪費益多不許則擾攘不已雖
皇恩浩蕩內帑充溢不能填無窮之壑而應無
限之求矣茲兵部一本為武職乞恩謹遵 明
旨叅酌輿情等事正為此請不惟妨冒濫之抑
亦絕紛擾之釁乞即批准以明典制以絕釁虞
臣無任瞻望之至謹題請旨

十二月上

歲暮代享諭回奏揭帖

題今日該文書官劉宣傳出

聖諭諭內閣歲暮廟享行禮朕偶爾感寒見今頭
暈身軟靜攝調理卿可傳示遣官及各執事務
秉精竭誠虔行禮供事毋得怠忽特諭卿知欽
此臣惟 皇上一身乃百神之所擁佑 九廟
之所憑依自非陰陽能為之患第今嚴冬之候
天氣轉溫稍失調護寒邪易入至于頭暈身軟
又似屬火或久于靜處鬱而不舒鬱能生火或

過外營擾而不清擾亦生火惟願 皇上飲食起居之間倍加節慎喜怒哀樂之發暢于中和則外邪自消氣脉和暢歲暮廟享未遑親奉孝思匪懈誠見于詞臣即當傳示遣官及各執事俾其務秉精誠謁虔供事又臣昨為 福王婚禮具揭以請伏蒙 皇上出閣講學之命不勝感服并傳示禮部擇日具儀以請除 御札尊藏閣中外謹具回奏

十二月二十九日上